

Timoteeo rai

Faborohacha letoai leinjiin

**Jauriaa nejeein Timoteeo rai
Faboroacha letoai quiricha**

1 ¹Canuna Jesocurisito letono Faboro neeun. Cana Coaunera corenihate jianacoo nihacache. Aihana jaun, Jesocurisitohachate cohajihacache coaiten enacoauneein cau turuhane chabana satonoelanaala rai Cojoanonaa que nihacachene coina. Cana Coaunera, Calaohi Jesocurisito, naaonjoainte canu cocoainaan caletaoe.

²Ii raine caa quiricha laenaunra cacalabi Timoteeo. Cacoreniha Cana Coaunera Calaohi Jesocurisito coitucuhina jaunte, cacalabi neeinha. Raotojoein neeine coina rai raotonoque ii rausiajeein ii coroatajaneene Cana Inaca Cana Coaunera, Cana Curuaanaa Jesocurisito, naaonjoain.

**Baasoneein cacha relaaunera que
necoeraain niha Timoteeone coina
suujuatiha Faborone**

³Masedonia cuhanulune ajiniha ichei aitocoaunlune tocohaneen nii Efesohacha neeu. Coa baaso que nii quiicha relaaunera relaaneranihene, coa inauhene coarajihia. ⁴Coa nereretanaa inoaei baasoque nereretanaaauu aina inara suujua cuaain nihache. Coatiha Cana Coaunera Aitoonjoan ichaain

tonoraacachene coina cana letoaera nihei. Rauhijiriin relanajaau Cana Coaunera esenetaain tonoraauruha caohatiin saaine coina.

⁵Baaso coacuelanaala caohatiin inara suujua coaraain, esinaaen rauhijiriin Cana Coaunera esenetaain, ita belaaichene coinana caa caritiin inara rai laenaun. ⁶Baaso erenaa que ita rai ereerejeein, Cana Coaunera Ere esine tonorana jihaneen raaje nitajeeuruha tabaaurune jaunna aitoon. ⁷Nitori-jihanei cachaaurute, cacha relaaneein nena jerecuree in nechu jataen joaenrein.

**Jeriha Acane rijijieein ichaoha cachane
coinate, aitiin Naitoonjoan laeneratelu
inoanenlu Cana Coaunera**

⁸Acaihanejein Cana Coauneraachate, rauhijiriin caohacha ichae. Baasoneein ichaoha cachane coataate niicha jerei tocohaneen aitiin laenaeratelu inoanenlu Cana Coaunera, Moisesa que. Aihana jaun, caohachaain rauhijiriin Cana Coaunera Aitoonjoan tonoraacachenete caohache. ⁹Coatiha caohacha cachaauru suujuateraanu que aitiin Naitoonjoan laenaeratiheilulu Cana Coaunera. Erenaa tonoraauruhi, itolere cacha amuritohe-riin suujua coaraain niha nocoetocuri suujuateraanu quete aitiin Naitoonjoan

laenaeratelu Cana Coaunera. Nechu aansai osaonaauru, Cana Coaunera Ere tonoraauruhi suujuateraanu quete nitohanein laenaeratelu Cana Coaunera. Fojiara que suujua acatieichuru, sonajaain jaorera, ¹⁰chaenchu sinijeranelanaala nenea ene aina ichaojeracoori, ene rijijieein namute quicha aina ichaojeracoori, quicha rijijieein namute ene aina ichaojeraqui, cacha basijiauhin necoretenacaauru, casajeeuru, chaenchu “Cana Coaunera te coaraje,” naain nohanenacaauru, naaonjoainuri suujuateraannu quete niicha jerei tocohanein aitiin Naitoonjoan laenaeratelu Cana Coaunera. Caohati cacha relanaanajaa caohateraneein nenacaauru suujuateraannu quete, niicha jerei tocohanein aitiin Naitoonjoan laenaeratelu Cana Coaunera.

¹¹Caa inara relaanune jaan caletoaera Cana Coaunera Ere rijijieeinte aite caa Cana Coaunera Aitoonjoan Inoaensi.

Faboro letoaa Cana Coaunerane

¹²Jataainna corojeeun, laraajiin cacha relaanune coina caletoa Cana Curuaanaa Jesocurisitona jaun. Caohachaaain rauhijiriin icharichaaunnine coitucuhana jaunte caletoe niicha jerenohin ichacaaunne coina.

¹³Baasoneeinna Jesocurisito que erein nere tonoraaurera cairichaerichae-toonlu. Nii atiinte atiin cacoelaain carae Cana Coaunera. Nii bana esenetaain coitucuenihanuluna jaunna nitohanein nerejetoonlu. ¹⁴Jataen cacoelaiha Cana Curuaanaa jaunna, nii ucuaetoha caa esenetaain jereein neeun.

¹⁵⁻¹⁶Esinaente rauhijiriin turuha uhe caa chauratane que Jesocurisito, jianacoon osaonaauru mitaane coina. Jana canuna osaonaauru nujuaneein

neeunlu niqui. Nete atiin cacoelai Cana Coaunera, osaonaauru nujua belaiha Cana Coaunerane coitucuuurua satiin cachaaurune coina. “Charijieeinteinti Faboro belai Cana Coaunera. Nii rijijieeintechu canu belachein,” naain Cana Coaunera esenetaerate nitajenaa charanejeein nenea ichaonaa raa cureein.

¹⁷Nii coreniha coanete caohatiin chabana onaa charanejeein nenea Cana Curuaanaa que raotojoein ereerejeein nihacache. Coanete acaihanejein chabana coarai Cana Coaunera ere tonoraain, caohatiin que ereerejeein nihacache inoaenlu netojoein.

Timoteo suujuatiha Faborone

¹⁸Nere beracuru que eletoaeratiha Cana Coaunerane rijijieein, laraajiin, neeunaain nere tonoraain ichaaura cacalabi Timoteo. ¹⁹Tabaaurute Cana Coaunera sacunaa jerecuruhane nihana-tiin, suujua coaraelanaala neein, rauhijiriin ichacurenihane necairichanaa coaracure. ²⁰Nitohaneainte situurelu Imeneeo, Alejaandoro, naaonjoaunri. Nii caajiiena Moconajaera que casetecaeratenajaaunlu, coaiteen enacoauneein Cana Coaunera que baasonein ereeuruhane coataa. Nijiaonriha iitonai nitoanein situhine.

Bajaeabajaecuchete satiin cachaauru coroatajanemiin Cana Coaunera

2 ¹Jauriaanejein Cana Coaunera bajaebajaecuchete satiin cachaauru coroatajanemiin. ²Bajaichenete, satiin curuaanaacuru, cocoaianacaihuri, naaonjoaunri suujuatiha Cana Coaunerane, raotojoein Cana Coaunera ere tonoraain ichaaurureein cachaauru. ³Nitohaneinte jeere nii jianacoo cana mitaera Cana Coaunera. ⁴Acate satiin jianacoo neein, nere esine coitucuhin

neen nihacachene jeere. ⁵Jana, Jesocurisitote laen, Cana Coaunera aina caohachaaain nihacachene caina, nii rucuheraanu que nenea ne. Cana rijijieein cachaneen nihan jaunte naine. ⁶Inae nitohaneen letoaa Cana Coaunerana jaunte, raajenihane cana coreniha coroso que ohe Jesocurisito, coreniha osa caje jianacoo nihacachene caina.

⁷Nii jaunna Jorio niheichuru relaeraannu que Cana Coauneraacha letoanojineen neen, rauhijiriin Jesocurisito coitucuruhanene caina. Curisito esenetaera nihanuna jaunna, rauhijiriin aitoon noanenaanelanaala.

Caohachaaain suujua coaraain neeuruha quichaauru aina enecurune

⁸Nii jaunna itolere sacutain, Cana Coaunera bajaauruha satiin cachaaurune jereen canu. Ita baijiaelanaala, raotiin suujua aina neen, biji michuin Cana Coaunera bajaa satiin nere tonoraeraaurune jereen.

⁹Coa cajione jataen coreti que necoreeteuruha enecuru. ¹⁰Coujuriu Jesocurisito esenetaeraneen nenea tocohaneein cacha belaihuruhine enecuru. ¹¹Cacha relaa relaerane, inauheneeicha aonajeein nerelaauruhine enecuru. ¹²Coatihachu chaen quichaauru relaauruha enecurune jerinaaun. Nijiaonria quichaauru amuritiin letoaauruha enecurune, ¹³necoaunaa Ebane ajiniha, Adaan coaunaain niha Cana Coaunerana jaun. ¹⁴Cachaauru coaunaa Cana Coaunerane bana, coatiha nii Adaan coritaa Moconajaera. Acaihanejin nii Ebaachate laen coritae. Nii jaunte osa que nesaruelu nii ene. ¹⁵Nii jaunte canaanai sirihane, inae janoaane rai cuna caaun necairichanaa coareein ene. Nete atiin jianacoon niha cuurein

ichoteratenajarichaaain Cana Coaunerane esenetaain nere tonoraaurera enecuru.

Cana Coaunera cachaauru beraicha neen nenacaauru

3 ¹Esaena rauhijiriin aitoreeunni. Cana Coaunera coitucuurera beraicha neen nenea jeriha chuneinete, caohati amihanenaa ichana jererein. ²Caohachaaain ichaohanete caohachae, neniha cotaichane caina. Leinjin ene lananeen nihanete caohachare. Chaen suujua coaraneen nihanete caohachae. Chaen nenajaun turuhi nihane, caohachaaain raeraneen neinihanete caohachae. Chaen caohachaaain cacha relaanete nere. ³Niheinchu chaen ajetoritelanaala, cacha leratelanaala, que tonaain chaque ereinihane abaantaain, coriqui mucuhanajaacha que coacuelanaala, naaonjoain nihanete caohachae. ⁴Chaen, caohachain sinijiera suujuatein, bereecuru suujuatein, saain nii loreri asaa nenacaauru suujuatein nihanete caohachare. Chaen suujua acatein, erenaa tonorain neeuruha bereecurunete caohachare. ⁵Inasiinte comasai suujuatenaa inaelanaala, niheichu bereecuru suujuatenaa inaelanaala nihane, chaen Cana Coaunera coitucuurera beraiche-beraichacuru. ⁶Chaenchu ena Cana Coaunera aina enonaa nihane, caohacharihei leeocho cachaauru amuritoheriin suujua coaraain itolere inaa nocoetohane. Charijieein teeinti ai Moconajaera, nii rijijieein situhane casetecaa Cana Coaunerane coataa. ⁷Chaenchu Cana Coaunera coitucuruhi cachaauru rai nihanatiin, suujua coaraneen nihanete caohachare, nabana batocuruhane coritaa Moconajaerane, nabana baasoneen ichaane coataa. Nitohaniha Cana Coaunera coitucuurera beraichanete caohachae.

**Cana Coaunera coitucuurera
coroatajanera- diaconooru**

⁸Suujua coaraneein niha Cana Coaunera coitucuurera coroatajanera-nete caohachare. Chaenchu casajenete-lanaala, ajetoritelanaala, niheinchu chaen coriqui basijiauna coacuelanaala, ⁹chaenchu chatohaneein teeinti nerejetelu Jesocurisito, caohatiin nii coitucuera nihanete caohachare. Chaenchu nii niicha coitucui suujuela-naala nihanete caohachare. ¹⁰Nitohaneein neeuruhane acaauru coujuhin acaauru coaracuchete, neniha acaauru rai lanaine Cana Coaunera coitucuurera coroatajaneranein neeuruhine.

¹¹Jerichanejeein enecuru netonai, caohachaa'in suujua coaraain neeuruhane-nete caohachare. Chaenchu casajenete-lanaala, niheinchu erenacaaotelanaala neeuruhanete caohachare. Itolerenein rauhijiriin caohachaa'in neeuruhanete caohachae. Nitohaneein neeuruha Cana Coaunera coitucuurera coroatajaneranein nenecaauru- diaconooru enecurunete caohachae. ¹²Jana quicha nihane leinjiin ene sinijieranein nihanete caohachare. Chaenchu, sinijiera suujuatein bereecuru suujuatein, saain nii loreri asae nenacaauru suujuatein nihanete caohachare. Nitohaneein neite caohachae Cana Coaunera coitucuurera coroatajanera- diacono nein nihane. ¹³Nitohaneein caohatiin acaauru amihaneon ichacuruhanete, acaauru belaiha cuururein cachaauru. Chaentechu jeelai amuritoheriin laraajiin Jesocurisito que cache relanaa nainecururein.

Cana Coaunera ranojoihunru cachaauru

¹⁴Enanecojoana turuhin ichoharaa uhene rijitoeun niqui, nechainti

nainerichaaunni. ¹⁵Nii jaunna inaien ichei caa quiricha letoareeunni, cojoainihanune, coujuriu Cana Coauneraaacha ranojoneein nenea nichei idesia neeichene jaan tocohaneein caohachaa'in neeichene coina. Cana Coaunera Ere Rauhi acateranihate neeure Cana Coaunera ranojoinunru cachaauru. ¹⁶Jataainte caohate esinaae rauhijiriin nii canaacha esenetai Jesocurisito niqui, nete coitucurene Cana Coaunera coitucuuruhi cachaauru.

Caa chauratane quete ecocoe
Jesocurisito cachaneein.

Nii janate coujuhin coaraa Cana Coaunera Suujuene jana caohate. Coujuhin coaraane janate, coarajeure Cana Coaunera letonocuru anjeraauru.

Nii jaunte amuhemujeein laurilaurichuru nenacaauru cachaauru rai beebjeeure Cana Coaunera coitucuurera, itolerenein caa chauratane sacutaain coitucuuruha cachaaurune coina.

Chaentechu enacoauneein dedeeu rae Cana Coaunera. Nitohaneeinte saain coitucuhacache.

Baaso que cachaauru relaaunera

4 ¹Rijieori banate Cana Coaunera ere jianein ratiriin casaje que acaauru relaa'in, acaauru coritaa osaaonaaunne esenetaain tonoraa cuururein tabaauru. ²Nitohaneeinte necoejena charaauru casaje cachaauru ere tonoraa cuururein, niritiinte be rauhijiriin Cana Coaunera Suujue. ³Nitohaneeite ene ranaa jeriha cachane caohatiha cuururein. Chaentechu nelanajanaa jeriha ene ne caohatiha cuururein. Chaentechu joanreein lenone que lenoniha cachane caohatiha cuururein. Raotojeein corajein Cana Coaunera bajaain que neleeoni-

jiaain niha Cana Coaunera Ere coitucuhin esenetaaurera cachaaaurune coina, itolere lenone coaunaain niha Cana Coaunera natiinte, que neleeeoni-jiaain niha cachane caohatiha cuurureein.

⁴Itolere Cana Coauneraacha coauna-nohinte caohachae. Nii jaun nainihe chaque irihacane. Nitohanihana jaunte, corojeein Cana Coaunera bajaain joaareein raacachene caohachae.

⁵Nitohaneein biha Cana Coaunera Erena jaunte caohachae. Chaenchu lenonichaachene ajiniha bajaacachenete caohachae.

Jesocurisito letono esine

⁶Caa caitoonjoan que cana nejeraauru- Cana Coaunera cachaauru relaainete, esinaaen rauhijiriin Jesocurisito letono esineeine niha curiquiin. Charijeein teeinti, lenonihane baiha raotojoein nelararajae cacha. Nii rijijieeinte Cana Coaunera ere coitucuhine laraajiin niha curiquiin, nii caohati nerelana najaain coitucuhin tonoraaine. ⁷Aihana jaun, casaje tonoraelanaala Cana Coauneraacha jerenohincha ichajeeincha neeu.

⁸Najaicharoaa cana jaberocone coinete nelate cojoanoonetojoein necoatijiaacane. Nii amuritoheriinte nelate itolere que rauhijiriin Cana Coaunera Ere tonoraacachene.

⁹Esinaaena aitoon, aihane jaun esenetaachenete ne. ¹⁰Acaihajein Cana Coaunera esenetaacachena jaunte cana batohin, cana necoeje chanuuruhanane niha natiin, neeunaain mainajeein amihanihakache.

Satiin cachate coroatajane Cana Coaunera. Jana esinaen rauhijiriin esenetaauruhanete, nii esenetaaurera coroatajaniha cureein, leeochoaauru

coroatajanihanane amuritoheriine.

¹¹Caritiin suujuatenajaain relanajaa.

¹²Enamanaa neeina jaun, ii batohin, ii necoeje chanuuruhanane niha natiin, coa tonoraa. Aihana jaun, atiin caohacha ichaain neeute, ii coaraain ichajijieein caohachaaain neeuruhine Cana Coaunera esenetaaurera. Caohatiin ereerejeein, caohatiin ii ichao que ichaohin, Cana Coaunera, leeochoaauru, naaonjoaainunri belaaain, Cana Coaunera Ere esenetaain, ishujua coaraain, naaonjoaain neeu atiin.

¹³Turuhanune reeintiaain, ita taojiaa cachaaaurune jana Cana Coaunera Ere coaraain itolere bana ereretaau. Chaenchu Cana Coaunera coreniha cana nejeraauru suujuateein relanajaa.

¹⁴Jiaonriha ichai Cana Coauneraacha tei amihanenaa jianeene. Acaauru letoaa Cana Coaunera Suujuene jaunte, ichouturi ichoae biji tein, ii cocoainaaunre Cana Coaunera coitucuurera ichauhenaaunre, nii niicha tei amihanenaa nainaaaine coina. Aihana jaun, coa janiha.

¹⁵Atiin itolere bana ii amihaneon chaaechajeein neeute, taeneein naurutanaurutaain cuujiha ii amihaneonne coaracurumiin satiin cachaauru.

¹⁶Aonaau. Caohatiin ishujua coaraain necohalajiin neein rauhijiriin cachaauru relaau laraajiin. Nitohaneein ichaainete, nichoteein jianacoo nerequiin ii ere aohanraauru aina.

Cana Coaunera coitucuurera aina suujua coaraain nihane

5 ¹Baasoneein ichaa chunei ichauhenane, coa cotaicha rijitiin suujua-tiha. Charijeein teeinti chaca suujuateene suujuateei. Nii rijijiein raotojoein belaaain suujuateeu. Chaenchu choaalacuru belaaaine rijitojoein enamanaacuru belaihu.

²Jericha nejeeinchu choba aina caoachaa in neeine rijijieein enecuru aina caoachaa in neeu. Jericha nejeeinchu ii baihuru aina caoachaa in neeine rijijieein ranunaauru aina netonai caoachaa in neeu.

³Niha autananeein enene coroataja-neeu, esinaen rauhijiriin cairichaineen nihane. ⁴Jana, niha calaohi, nichoala, naaonjoainne fojiaraauru nihane coitucuhin, coitucueracuru neein nihane coitucuhin coroatajanecuruhinete, nii acaauru fojiaa acaauru fojiarane acatiha tacaain cainaauruhine, nitohaneen jeriha Cana Coaunerana jaun.

⁵Canaanai sirilanaala jataen jelai nihanete, Cana Coaunera bajaebajaecure janotiin netojoein autanaauru esineeuru, acaauru coroatajanena nainiha Cana Coaunerane coitucuuruhana jaun. ⁶Jana, itolere rucuheluuruhacha coacuhin caohatiin neruujuein raotojoein ichaonaa coaauca autananete, ninauhene nena rijijiein niha cureein.

⁷Caritiinchu acaauru relaa, suujuatera latecuruhane coataa. ⁸Chunicoha chaelai latiha naraaichurune jana coroatajanena jerenihane choae tacaain fojiaraauru coroatajanenaa jerenihanete, Cana Coaunera coitucuuruhi fautaeriin nereein, "Cana Coaunera coitucuhanu," naane niha natiin, Cana Coaunera Ere tonoraenihane.

⁹Coa joaenreein autana curuaa laenaa, autana esine canaacha coroatajaneeni curuaacuru siricha quiricha cuhane. Caohachaa in saota choonca ajaanaca niha autanane curuaa laenaa. Chaen leiijiin quicha aina neein autana nihane, curuaa laenaa. ¹⁰Chaenchu jaiti jiniiquiin ichaohin neeuruhane caje coauneen, caohatiin bereecuru fojiara neein, rene bedaenecuruha niicha coitucuuruhi cachaaaurune jana caohatiin raera neein, rene bedaenecuruha cana nejeraauru- Cana Coaunera

coitucuurerane jana jataen belaa in raera neein, necairichaa chuneine jana coroatajanera neein, naaonjoaain neinihanete caohachare.

¹¹Jana jaiti ena nichauhenane cataaun tiha autanane, coa curuaa laenaa quiricha cuhane. Nabana "Inae coaiteen nelanajariaunni," naain iriha Jesocurisito raine baiha, ¹²Jesocurisito ere tonorana coiinteein enacoauneen nelanajaane, caseteco coaraane coataa. ¹³Chaenchu bajeritiin neein, le lorerichuru asae cuhin cajihaneen casaje que ereerejee in itolere cachaaacha rautaai que enohane coataa.

¹⁴Nii jaunna, jaiti ranunaniha autanane nelanajaane jereeun. Nelanajain bereecuru fojiaain, rai namihaneon ichaane jereun, nihei cha que lerateen coulurujuenaa naineniha Moconajaerane coina. ¹⁵Tabaaauru Cana Coaunera jianeen, Moconajaera ere tonoraauruha autanaaurune jaun.

¹⁶Cana Coaunera coitucuhin esenetaeraauru enecuru, autananiha chuni naraaine coroatajanemii. Nabana jataen mainajee in amihaneen coroatajanecuruha Cana Coaunera rai ita taojieraauru cachaaaurune coataa. Nitohaneen ichaquichenete, esinaen cairicheineen nenacaauru autanaauru coroatajanena nainecurureein Cana Coaunera rai ita taojieraauru cachaaauru.

**Cana Coaunera rai ita taojieraauru
cachaaauru ichauhenaauru
coroatajanecuche**

¹⁷Atiin caohatiin Cana Coaunera rai ita taojieraauru cachaaauru suujuateen beraihurera ichauhenaauru belain coroatajanecuruhine. Chaenchu acaihaneje in Cana Coaunera Ere beebejee in cachaaauru relaaureraacha coroatajanecuruhine, leeochoauru coroatajanecuruhane amuritoheriin.

¹⁸"Baca amiharateeiche aroso rojoenaa quene, coa aroso quihane

coataa borasa que nujuaen conajain amiharatihache,” aitoa Cana Coaunera ere cuhanaine jaun, amihanihane coreniha quihanete caochachae. Nii rijijiein core raauruha nii Cana Coaunera Ere beebejeein cacha relaaurera ichauhenaaaurunete caohachae.

¹⁹Neniha coroatajaain, nichatajaain, naaonjoain coaraaurune jana ii rai ichauhena coulurujiha chuneine coa tonoraa. ²⁰Chaenchu baaso ichaechajeein nosatihajeein sacuha chunei ichauhenane, ita taojiaauruha cachaaurune jana, aonajeeuruha satiinne urichoo mijiainetiin rai aitiin suujuateute caje coaraain casihuruhine nii leeochoauru.

²¹Chunei jataain ii suujua acateeine jaan niha natiin baaso ichaane, ita taojiaauruha cachaaurune jana acaauru suujuateeu, caa aitocoanne tocoaneein. Cana Coaunera, Cana Curuaanaa Jesocurisito, chaen janijiin nii niicha raauri letonocuru anjeraauru, naaonjoaihunri notaracaena caa caritiin eletoaan, atiin nitohaneein ichaine caina.

²²Ena Jesocurisito esenetaera nihane, coa Cana Coaunera rai ita taojiaeraauru bichauhenaneein enoha, nabana enoin baasoneein ichaane, coroatajaneranein ii nerotohine coata. Atiin ishujua coaraain neeu.

²³Cunaitejerii ii suriquene rijijiein, coa jeesiaanca nejesinaacha coha. Aansijiin bino cohin coaraau.

²⁴Inanacaa tabaauru osaque nesaruhane, “Naaonjoaainte nera,” nain que iriha chuneine latelanaala. Jana tabaauru raite inanacaene, “Naaonjoaainte nera,” nain que erei colane.

²⁵Jericha nejeeintechu nii rijijiein inanacae caohacha ichaain niha

cachane. Jana jauriaanejeein inanacae-nihane nihanatiinte nirijiein cuaajeein inanacaa cue.

Niha fatoroonne

6 ¹Rebeeocuruha fatoroon quene, nere tonoraauruhine. Nabana Cana Coaunera que ereein, nii Jesocurisito que cacha relaacachene que ereein cana que baasoneein ereeuruhane coataa. ²Chaenchu Jesocurisito coitucuhin esenetaera niha fatoroonne jerichanejeein nere tonoraauruhine. Jesocurisito coitucuha fatoroonne coreniha acaauru nejera rijijiein nihane coreniha, coa baasonein nere tonoraauruha. Nii choae jauhecotojoeriin coroatajanecurumiin nere tonoraain, Jesocurisito esenetaera fatoroon nihane.

Itolere coitucuha nocoetocuri

³Caritiin relanajaeniha chuneine, Cana Curuaana Jesocurisito ere rauhi tonoraelanaala neeuruhane coataa, rauhijiriin cana relaa cana relaaurerane jaan tonoraelanaala nenaate, ⁴itolere coitucuera niha nocoetoreein. Niite ita cotainaa jererein joaenrein casaje coreniha nejesinajeein. Nitoaneeinte ita inasinee rijitoherijitoein, ita cotaain, ita que ereein, ita esenetaelanaala, ⁵ita que nejesinnajeein nejeratein ita cotaairiin neeurein. Nitohaneeinte neeurein esinaen erenaa rauhi baitein naasaenacaauru. Nitorijia neeinchurute necoriquijiaain, nerujueleitein nena coacuhin Cana Coaunera Ere tonorana jererein inacojoein. Nitohanaa nihane, caje neloona.

⁶Jataante nelate, caa chauratane que nena rucuhele que cana sujuatela-naala, raotojoein Cana Coaunera esenetaain tonoraacachene.

⁷Charijiein teeinti nejanoaacachene cha colane nejanoaacache. Nii rijijiein-

techu ohacachene, cha amaelanaala curichaachein dedeeu. ⁸Aihana jaun neejija cana lenone, cana cajione naajeine, niicha aina raotojoein nihacachenete caohachae.

⁹Jana coriqui, rucuhele, naaonjoain taojiana jereraaurute raaje necairi-chaaure. Inacojoein necoriquihana que sujuateente, raajenhane necoritaain necairichaaureein nitohanein nena jeraaauru. ¹⁰Caoha-chaai jataen coriquicha jeriha cachane, cacha aasaeranein niha coriquina jaun. Nii corenihate Cana Coaunera esenetaain tonorana jianein, raajenhane necairi-chaaure cacha tabaauru.

Jesocurisito esenetaain neunaain ichaau

¹¹Jiaonriha nitohanei ichaain neei Cana Coaunera coitucuera neeina jaunne. Cana Coaunera Ere tonoraain, Cana Coaunera Ere esenetaain, Cana Coaunera belaaain, cachaauru belaaain, joanreein abaantain, ishujua coaraain, naaonjoaain nii ichaonaa caohachaacha sacuu.

¹²Arajiin aonajeureru urichoo, “Inaen Cana Coaunera Calaohi Jesocurisito esenetaain nere tonorarichaunni,” naailune jaun, laraajiin neeunaain, caohachaain nii sanaachara nejeein nena ichaonaa caohati que nemucuhin atiin ichaa. Nii ichaaine coina ichotijiaa Cana Coaunerana jaan ichaa.

¹³Itolere cachaauru rai ichaonaa tera Cana Coaunera notaracae, chaen nii cocoainanacai Ponsio Filato rai caohati erena que erei Jesocurisito notaracaena, ichei caa aitiin eletaun.

¹⁴Caa ichei aitocoanne rijijiein rauhijiriin ichaa. Nabana coaiteen caa chauratane que turuha Jesocurisitone bana que necocauhataaaine coataa.

¹⁵Inae cuu tihane banate, Jesocurisito ecotiha currein acaihanejin Cana

Coaunera- canaacha belaa satiin curuaanaacuru curuaanaa. ¹⁶Acate chariji bana onaachara nejeein ne. Chabana cacha turunaja nihein cono tabai jana ne nii Cana Coaunera inanacaelanaala nena. Acate acanein nereein itolere amuritoheriin laraajiin itolere bana coroaenohinein.

Nitohanein neeine.

Coriqui nebaauru sujuatihane

¹⁷Coriqui neba niha chuneine, coa “Chabana, cha lateriaunni,” naain leeochoaauru que necohasitaain niha. Enaichate nitajihane, nitajeeorichein coriqui. “Cana coroatajanerihani Cana Coaunerana jaun cha lateriaunni,” naauruhine. Acate canaacha latei teranein ne, raotojoein cha latelanaala nihacachene coina. ¹⁸Aihana jaun cairichaihuru coroatajanejeein nein, raotojoein nein chelai latecuruha leeochoaaurune, acaauru rai tihajeein neeuruhine coriquihonaauru. ¹⁹Nitohanein neeuruhanete, nii acatiha tacaain belainaanca Cana Coaunerane, nii niicha tei ichaonaa chabana nitajenaa-chara nejeein nena raa cuurureein, necairichanacaauru coroatajanecuruhane jaun.

Satonotihane rai Timoteeo sujuatiha Faborone

²⁰⁻²¹Caa ichei caitoonjoa erena rauhi tonoraau inoaenlu netojoein. Coa caa chauratane que ecocohin nena erena tonoraa. Coa, coitucuhara rijitiin turuhin casaje que inara relaeranihane coa tonoraa. Nitohanai tonorauruhane, Cana Coaunera bero rauhi edaa cuuruha tabaaurune jaun.

Icholaain ii beraaine Cana Coaunerara Timoteeo.

Inaen saa.